

# Enam pantai kritikal terdedah ancaman hakisan

**Kuala Terengganu:** Kementerian Sumber Asli dan Alam Sekitar mengenal pasti enam pantai, termasuk satu di Kelantan berada dalam keadaan kritikal dan projek mencegah hakisan termasuk pembinaan benteng pemecah ombak perlu dilakukan segera menggunakan peruntukan di bawah kerja darurat.

Menterinya, Datuk Seri Wan Junaidi Tuanku Jaafar, berkata Kerajaan Pusat meluluskan peruntukan segera sebanyak RM14 juta bagi membolehkan kerja pencegahan hakisan termasuk projek penambahan pasir dan pembinaan struktur pemecah ombak dilakukan.

Katanya, enam pantai di Terengganu dan Kelantan yang dikenal pasti berada dalam keadaan kritikal serta terdedah kepada hakisan ialah Pantai Teluk Lipat di Dungun, Bukit Keluang, Besut, Pantai Kemasik, Kema-



**Pembinaan benteng pemecah ombak** giat dijalankan di pantai Tok Jembal.

[FOTO ASWADI ALIAS/BH]

man, Tanjung Gelam, Kuala Nerus, Pantai Rusila, Marang serta Pantai Kundur, Kota Bharu.

## Lulus kerja cegah hakisan

"Kita meluluskan peruntukan se-

gera bagi membolehkan kerja pencegahan hakisan dilakukan di Pantai Teluk Lipat, Dungun memabitkan peruntukan RM3.5 juta, Pantai Rusila Marang (RM3 juta), Bukit Keluang, Besut (RM1.5 juta),

Pantai Kemasik di Kemaman (RM2 juta), Pantai Tanjung Gelam, Kuala Nerus (RM3 juta) serta Pantai Kundur di Kelantan dengan kos RM1 juta," katanya ketika meninjau projek mencegah

hakisan pantai di Tok Jembal, di sini, semalam.

Yang turut hadir, Ketua Setiausaha Kementerian Sumber Asli dan Alam Sekitar, Datuk Seri Azizan Ahmad, Pengarah Unit Perancang Ekonomi negeri (UPEN), Zainal Abidin Hussin, Pegawai Daerah Kuala Nerus, Azmi Razik dan Pegawai Pembangunan Kuala Nerus, Datuk Basir Ismail.

Wan Junaidi berkata, Kerajaan Pusat juga meluluskan peruntukan RM15 juta untuk melaksanakan projek tebatan banjir, pemulihan dan menaik taraf Sungai Cepuh, Telemong serta melaksanakan projek tebatan banjir Kuala Terengganu utara berjumlah RM10 juta.

Katanya, sebanyak RM12 juta pula diperuntukkan untuk melaksanakan sistem saluran mesra alam di Kampung Gong Kiat dan Kampung Guntung Luar di Setiu.